

“Open bank” aksiyadorlik jamiyati
Aksiyadorlar umumiy yig‘ilishining
2025-yil 20-oktabrdagi
5-sonli yig‘ilish bayonnomasiga
5 -ilova

«OPEN BANK» AKSIYADORLIK JAMIYATI
KUZATUV KENGASHI TO‘G‘RISIDAGI
NIZOM

Toshkent – 2025-yil.

Mazkur "Open bank" aksiyadorlik jamiyati Kuzatuv kengashi to'g'risidagi nizom" (keyingi o'rinlarda Nizom deb yuritiladi) O'zbekiston Respublikasining "Banklar va bank faoliyati to'g'risida"gi, "Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunlari va boshqa amaldagi qonunchilik hujjatlari hamda "Open bank" aksiyadorlik jamiyati Ustaviga muvofiq ishlab chiqilgan.

1-bob. Umumiy qoidalar

1. Ushbu Nizom "Open bank" aksiyadorlik jamiyati (bundan buyon matnda Bank deb yuritiladi) Kuzatuv kengashi maqomini va faoliyat yuritishini belgilaydi, Bank Kuzatuv kengashi (keyingi o'rinlarda Kuzatuv kengash deb yuritiladi) tomonidan amaldagi qonunchilik hujjatlariga va Bank Ustaviga muvofiq o'z vakolatiga kiritilgan qarorlar qabul qilinishini tartibga soladi.

2. Kuzatuv kengash Bank faoliyatiga umumiy rahbarlikni amalga oshiradi, boshqaruvga oid qarorlar qabul qilish jarayonida nazorat va tekshiruv vazifasini bajaradi hamda umuman Bankning faoliyati va moliyaviy barqarorligi uchun javobgar hisoblanadi. Aksiyadorlarning umumiy yig'ilishi vakolat doirasiga kiritilgan masalalarni hal etish bundan mustasno.

3. Kuzatuv kengash Bankni samarali va tadbirli boshqarishni, shu jumladan Bank Boshqaruvi (keyingi o'rinlarda Boshqaruv deb yuritiladi) a'zolari o'rtasida vakolatlarning hamda javobgarlikning taqsimlanishini, manfaatlar to'qnashuvining oldi olinishini va bartaraf etilishini ta'minlaydigan boshqaruv tashkiliy tuzilmasini belgilaydi hamda uning joriy etilishi ustidan nazorat va tekshiruvni amalga oshiradi.

4. Kuzatuv kengash a'zolari Bankning oqilona korporativ boshqaruviga ko'maklashishi hamda o'z vakolatlarini va majburiyatlarini bajarish chog'ida Bankning, uning omonatchilari va aksiyadorlarining qonuniy manfaatlarini inobatga olishi, shuningdek Markaziy bank bilan samarali hamkorlikni ta'minlashi kerak.

2-bob. Bank Kuzatuv kengashining vakolat doirasi va majburiyatlari

5. Kuzatuv kengashning vakolat doirasiga quyidagilar kiradi:


Bankni rivojlantirish strategiyasiga erishish bo'yicha ko'rilayotgan chora-tadbirlar to'g'risida Boshqaruvning hisobotini muntazam ravishda eshitib borgan holda Bank faoliyatining ustuvor yo'nalishlarini belgilash;

Aksiyadorlarning yillik va navbatdan tashqari umumiy yig'ilishlarini chaqirish, qonunchilik hujjatlarida nazarda tutilgan hollar bundan mustasno;

Aksiyadorlarning umumiy yig'ilishi kun tartibini tayyorlash;

Aksiyadorlarning umumiy yig'ilishi o'tkaziladigan sana, vaqt va joyni belgilash;

Aksiyadorlarning umumiy yig'ilishi o'tkazilishi haqida xabar qilish uchun Bank aksiyadorlarining reyestrini shakllantirish sanasini belgilash;



Bank Ustaviga o'zgartish va qo'shimchalar kiritish yoki Bankning yangi tahrirdagi ustavini tasdiqlash masalalarni Aksiyadorlarning umumiy yig'ilishi hal qilishi uchun kiritish;

mol-mulkning bozor qiymatini belgilashni tashkil etish;

korporativ maslahatchini tayinlash va uning faoliyatining tartibini belgilovchi nizomni tasdiqlash;

ichki audit xizmatini tashkil etish va uning xodimlarini tayinlash, shuningdek har chorakda uning hisobotlarini eshitib borish;

Boshqaruvning faoliyatiga daxldor har qanday hujjatlardan erkin foydalanish va Kuzatuv kengash zimmasiga yuklatilgan vazifalarni bajarish uchun bu hujjatlarni Boshqaruvdan olish;

Kuzatuv kengash va uning a'zolari olingan hujjatlardan faqat xizmat maqsadlarida foydalanishi;

auditorlik tekshiruvini o'tkazish (majburiy auditorlik tekshiruvi bundan mustasno), auditorlik tashkilotini belgilash, uning xizmatlariga to'lanadigan eng ko'p haq miqdori va u bilan shartnoma tuzish (shartnomani bekor qilish) to'g'risida qaror qabul qilish;

dividend miqdori, uni to'lash shakli va tartibi yuzasidan tavsiyalar berish;

Bankning zaxira fondidan va boshqa fondlaridan foydalanish;

Bankning filiallarini, bank xizmatlari ofisini va boshqa alohida bo'linmalarini hamda vakolatxonalarini ochish hamda yopish;

Bankning shu'ba va tobe xo'jalik jamiyatlarini tashkil etish;

"Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunning 8-bobida (Yirik bitimlar tuzish) va 9-bobida (Affillangan shaxslar bilan bitimlar tuzish) nazarda tutilgan hollarda Bank tomonidan bitimlar tuzish to'g'risida qaror qabul qilish;

yirik bitim tuzish masalasi bo'yicha Kuzatuv kengashning yakdilligiga erishilmagan takdirda yirik bitim tuzish masalasini Aksiyadorlarning umumiy yig'ilishiga hal qilishi uchun olib chiqish to'g'risida qaror qabul qilish;


Bankning tijorat va notijorat tashkilotlardagi ishtiroki bilan bog'liq bitimlarni qonunchilikda belgilangan tartibda tuzish;

Kuzatuv kengash qoshidagi qo'mitalarni tuzish va ular to'g'risidagi nizomlarni tasdiqlash;

Bankning ustav kapitalini ko'paytirish, shuningdek Bank Ustaviga Bankning ustav kapitalini ko'paytirish hamda Bankning e'lon qilingan aksiyalari sonini kamaytirish bilan bog'liq o'zgartish va qo'shimchalar kiritish;

"Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunning 34-moddasiga muvofiq aksiyalarni joylashtirish (tashkil etilgan qimmatli qog'ozlar savdolariga chiqarish) narxini belgilash;

Bank tomonidan depozit sertifikatlarini chiqarish, ularni qaytarib sotib olish to'g'risida qarorlar qabul qilish;



Bank tomonidan korporativ obligatsiyalar, shu jumladan, aksiyalarga ayirboshlanadigan obligatsiyalar chiqarish to'g'risida qaror qabul qilish;

qimmatli qog'ozlarning hosilalarini chiqarish to'g'risida qaror qabul qilish;

Bankning korporativ obligatsiyalarini qaytarib sotib olish to'g'risida qaror qabul qilish;

Boshqaruvni tuzish, uning rahbarini saylash (tayinlash), rahbarning vakolatlarini muddatidan ilgari tugatish;

Boshqaruv a'zolarini saylash (tayinlash), ularning vakolatlarini muddatidan ilgari tugatish;

Boshqaruvga to'lanadigan haq va (yoki) kompensatsiyalarni, shuningdek ularning eng yuqori miqdorlarini belgilash;

Bankning yillik biznes rejasini tasdiqlash;

Boshqaruv raisi bilan mehnat shartnomasini tuzish, shartnomaning amal qilish muddatini uzaytirish yoki uni bekor qilish;

Boshqaruv raisining vakolati muddatidan ilgari tugatilgan taqdirda, uning vazifasini vaqtincha bajaruvchini tayinlash;

qonunchilik hujjatlariga muvofiq Kuzatuv kengash vakolatiga kiruvchi Bankning boshqa ichki meyoriy hujjatlarini tasdiqlash hamda ularga o'zgartirish va qo'shimchalar kiritish;

Bankning kapital va umumiy zaxiralarining yetarli darajada saqlab turilishini ta'minlash;

Bankning uzoq muddatli moliyaviy manfaatlarini va Markaziy bank tomonidan kapitalga nisbatan belgilangan talablarni hisobga olgan holda prudensial talablarga rioya etilishini ta'minlash;

qonunchilik hujjatlariga hamda mazkur Ustavga muvofiq Kuzatuv kengashning vakolat doirasiga kiruvchi boshqa masalalarni hal qilish.

6. Amaldagi qonunchilik hujjatlari, Bank Ustavi va mazkur Nizom bilan Kuzatuv kengashning vakolat doirasiga kiritilgan masalalar hal qilish uchun Boshqaruvga o'tkazilishi mumkin emas.

7. Kuzatuv kengashning majburiyatlari quyidagilardan iborat:

o'z vakolatlarini aksiyadorlar manfaatlarini ko'zlab amalga oshirish;

Bankka o'z vakolatlariga mos ravishda rahbarlik qilishni ta'minlash;

Bank faoliyati ustidan joriy nazoratni amalga oshirish;



Bankning yetarli darajadagi kapitallashuvini ta'minlash;

Bank faoliyati strategiyasini shakllantirish;

Bankni rivojlantirish bo'yicha qabul qilingan biznes-rejalar ijrosini nazorat qilish;

Bankning foyda ko'rishi monitoringini olib borish;

korporativ boshqarish bo'yicha qonunchilik hujjatlari bilan belgilangan talablarga rioya qilinishi to'g'risidagi hisobotni Aksiyadorlarning umumiy yig'ilishiga taqdim etish;



O'zbekiston Respublikasining amaldagi qonunchilik hujjatlari va Bank Ustavida hamda ushbu Nizomda nazarda tutilgan boshqa majburiyatlarni bajarish.

3-bob. Kuzatuv kengashni tashkil qilish tartibi

8. Kuzatuv kengashning tarkibi 5 (Besh) a'zodan iborat bo'ladi. Kuzatuv kengash a'zolari o'z mulohazalarining mustaqilligi bo'yicha talablarga rioya etishi kerak.

9. Kuzatuv kengashning a'ziligiga ko'rsatilayotgan nomzodlarni ularning lavozimga kirishishidan oldin Markaziy bank bilan kelishiladi.

10. Kuzatuv kengashning a'zolari "Aksiyadorlik jamiyatlari va aksiyadorlar huquqlarini himoya qilish to'g'risida"gi O'zbekiston Respublikasi Qonunida, Bank Ustavida va mazkur Nizomda nazarda tutilgan tartibda Aksiyadorlarning umumiy yig'ilishi tomonidan uch yil muddatga saylanadi.

Kuzatuv kengash tarkibiga saylangan shaxslar cheklanmagan tarzda qayta saylanishi mumkin.

Quyidagi hollarda shaxs Kuzatuv kengash a'ziligiga saylanishi mumkin emas yoki saylangan shaxs Kuzatuv kengash a'zoli huquqidan mahrum etiladi, agar:

shaxs ikki yoki undan ortiq bankning Kuzatuv kengashi a'zosi bo'lsa yoki a'zo bo'lish niyatida bo'lsa, bundan mazkur banklar bir bank guruhiga tegishli bo'lgan hollar mustasno;

shaxsning vakolatlari Markaziy bank talabiga ko'ra muddatidan ilgari tugatilgan bo'lsa;

Boshqaruv a'zolari, uning sho'ba va tobe xo'jalik jamiyatlarida mehnat shartnomasi (kontrakt) bo'yicha ishlayotgan shaxslar va ushbu jamiyatlar boshqaruv organlarining a'zolari;

Bankda mehnat shartnomasi (kontrakt) bo'yicha ishlayotgan shaxslar.

11. Kuzatuv kengash a'zolaridan kamida bir nafari mustaqil a'zodan iborat bo'ladi.

Quyidagilar Kuzatuv kengashning mustaqil a'zosi bo'lishi mumkin emas:

so'nggi uch yil ichida Bankda va (yoki) Bankning affillangan shaxslarida ishlagan shaxs;


Bankning aksiyadorlari;

Bankning va (yoki) uning affillangan shaxsining yirik mijozi va (yoki) yirik yetkazib beruvchisi bilan fuqarolik-huquqiy munosabatlarda bo'lgan shaxs. Bunda qaysi shaxslar bilan bazaviy hisoblash miqdorining ikki ming baravaridan ko'p bo'lgan summaga teng amaldagi shartnoma mavjud bo'lsa, o'sha shaxslar yirik mijoz va yirik yetkazib beruvchi deb e'tirof etiladi;

so'nggi uch yil ichida Bankka va (yoki) Bankning affillangan shaxslariga auditorlik xizmatlarini ko'rsatgan auditorlik tashkilotining xodimi;

ketma-ket olti yil davomida Kuzatuv kengash tarkibiga kirgan shaxs;

Bank va (yoki) uning affillangan shaxslari bilan biror-bir kelishuvga ega



bo'lgan shaxs, bundan Kuzatuv kengash a'zosining vazifalari bajarilishini ta'minlash bilan bog'liq bo'lgan kelishuvlar mustasno;

Bankning boshqaruv va ichki nazorat organlarining va (yoki) uning affillangan shaxslarining a'zosi bo'lgan shaxsning yoki so'nggi uch yil ichida ularga a'zo bo'lgan shaxsning yaqin qarindoshi yoki quda tomondan qarindoshi (ota-onasi, aka-ukalari, opa-singillari, o'g'illari, qizlari, eri (xotini), shuningdek erining (xotinining) ota-onasi, aka-ukalari, opa-singillari va farzandlari) bo'lgan shaxs;

davlat boshqaruvi organining yoki davlat korxonasining xodimi bo'lgan shaxs;

Bank Ustavida yoki Aksiyadorlarning umumiy yig'ilishi qarorlari bilan tasdiqlangan hujjatlarda belgilangan talablarga muvofiq bo'lmagan shaxs.

Kuzatuv kengash a'zolarining ko'pchiligi Bankka aloqador shaxslar bo'lmasligi kerak, bundan ularning Kuzatuv kengashdagi a'zoligi mustasno.

Kuzatuv kengashning mustaqil a'zosi Kuzatuv kengashning boshqa a'zolari bilan bir qatorda "Aksiyadorlik jamiyatlari va aksiyadorlar huquqlarini himoya qilish to'g'risida"gi O'zbekiston Respublikasi Qonunida belgilangan teng huquqlar va majburiyatlarga ega bo'ladi.

12. Kuzatuv kengash tarkibiga saylanadigan shaxslarga nisbatan qo'yiladigan talablar Bank Ustavida yoki Aksiyadorlarning umumiy yig'ilishi qarori bilan belgilab qo'yilishi mumkin.

13. Kuzatuv kengash a'zosining vakolatlari quyidagi holatlarda tegishli asoslar bo'yicha bekor qilinishi mumkin:

aksiyadorlarni yozma shaklda xabardor qilgan holda o'z vakolatlarini ixtiyoriy ravishda topshirish;

Aksiyadorlarning umumiy yig'ilishi tomonidan tegishli qaror qabul qilinishi; qonunchilikda belgilangan boshqa hollarda.

4-bob. Kuzatuv kengash raisi

14. Kuzatuv kengashning raisi Kuzatuv kengashi a'zolari tomonidan Kuzatuv kengash tarkibidan Kuzatuv kengashi a'zolarining umumiy soniga nisbatan ko'pchilik ovoz bilan saylanadi.

15. Kuzatuv kengash o'z raisini Kuzatuv kengash a'zolarining umumiy soniga nisbatan ko'pchilik ovoz bilan qayta saylashga haqli.

16. Kuzatuv kengashning raisi:

Kuzatuv kengash ishini tashkil etadi;

Kuzatuv kengash majlislarini chaqiradi va ularda raislik qiladi; majlislarda bayonnoma yuritilishini tashkil etadi.

17. Kuzatuv kengashning raisi qonunchilik hujjatlarda nazarda tutilgan boshqa vakolatlarga ham ega bo'lishi mumkin.

18. Kuzatuv kengash raisi bo'lmagan taqdirda uning vazifasini Kuzatuv



kengashning a'zolaridan biri amalga oshiradi.

5-bob. Kuzatuv kengash majlisi

19. Kuzatuv kengash majlisi quyidagi hollarda chaqiriladi:

Kuzatuv kengash raisi tomonidan uning o'z tashabbusiga ko'ra;

Kuzatuv kengash a'zosining talabiga ko'ra;

Taftish komissiya (Taftishchi)ning talabiga ko'ra;

Boshqaruv raisi va a'zosining talabiga ko'ra;

Bank Ustavida belgilangan boshqa shaxslarning talabiga ko'ra.

20. Kuzatuv kengash majlisini o'tkazish uchun kvorum Kuzatuv kengash a'zolari belgilangan sonining kamida 75 (Yetmish besh) foizini tashkil qilishi kerak.

21. Kuzatuv kengash a'zolarining soni Bank Ustavi va mazkur Nizomda nazarda tutilgan miqdorning 75 (Yetmish besh) foizidan kam bo'lgan taqdirda, Aksiyadorlarning umumiy yig'ilishi tomonidan Kuzatuv kengashning yangi tarkibi saylanadi.

22. Kuzatuv kengash majlisida qarorlar, agar qonunchilik hujjatlarida hamda Bank Ustavida va mazkur Nizomda o'zgacha qoida nazarda tutilmagan bo'lsa, majlisda hozir bo'lganlarning ko'pchilik ovozi bilan qabul qilinadi. Kuzatuv kengash majlisida masalalar hal etilayotganda Kuzatuv kengashning har bir a'zosi bitta ovozga ega bo'ladi.

Shuningdek, Kuzatuv kengash qarorlari sirtidan ovoz berish yo'li bilan (so'rov yo'li bilan) Kuzatuv kengashning barcha a'zolari tomonidan bir ovozdan qabul qilinishi mumkin.

23. Kuzatuv kengash majlisida quyidagi qarorlar bir ovozdan qabul qilinishi lozim:

Bankning ustav kapitalini ko'paytirish, shuningdek Bank Ustaviga Bankning ustav kapitalini ko'paytirish hamda Bankning e'lon qilingan aksiyalari sonini kamaytirish bilan bog'liq o'zgartish va qo'shimchalar kiritish;


aksiyalarga ayirboshlanadigan korporativ obligatsiyalar chiqarish;

balans qiymati yoki olish qiymati bitim tuzish to'g'risida qaror qabul qilinayotgan sanada Bank sof aktivlari miqdorining 15 (O'n besh) foizidan 50 (Ellik) foizigachasini tashkil etuvchi mol-mulk xususida yirik bitim tuzish;

affillangan shaxs bilan bitim tuzish.

24. Kuzatuv kengashning ikki va undan ko'proq a'zosi affillangan shaxslar bo'lgan holatda, bitim bo'yicha qaror Aksiyadorlarning umumiy yig'ilishi tomonidan qabul qilinadi. Bankning affillangan shaxsi Kuzatuv kengash yoki Aksiyadorlarning umumiy yig'ilishi tomonidan ushbu bitim bo'yicha qaror qabul qilinishida muhokamada ishtirok etishga va ovoz berishga haqli emas.

25. Kuzatuv kengashning bir a'zosi o'z ovozini Kuzatuv kengashning boshqa a'zosiga berishga yo'l qo'yilmaydi. Kuzatuv kengash a'zolarining ovozlari teng



bo'lgan taqdirda Kuzatuv kengash tomonidan qaror qabul qilishda Kuzatuv kengash raisining ovozi hal qiluvchi hisoblanadi.

26. Kuzatuv kengash o'z ishini tashkil qilish uchun kotibni tayinlashi mumkin. Kotib Kuzatuv kengash va (yoki) Boshqaruv a'zosi hisoblanmaydi va u Kuzatuv kengashga hisobdor.

27. Kuzatuv kengash majlisida bayonnoma yuritiladi. Kuzatuv kengash majlisining bayonnomasi majlis o'tkazilganidan so'ng 10 (O'n) kundan kechiktirmay tuziladi. Majlis bayonnomasida quyidagilar ko'rsatiladi:

majlis o'tkazilgan sana, vaqt va joy;

majlisda hozir bo'lgan shaxslar;

majlisning kun tartibi;

ovoz berishga qo'yilgan masalalar, ular yuzasidan o'tkazilgan ovoz berish yakunlari;

qabul qilingan qarorlar.

28. Kuzatuv kengash majlisining bayonnomasi majlisda ishtirok etgan Kuzatuv kengash a'zolari tomonidan imzolanadi.

29. Kuzatuv kengash majlisining bayonnomasi imzolangan kuni Boshqaruvga ijro etish uchun topshiriladi. Kuzatuv kengash Aksiyadorlarning umumiy yig'ilishini qaror qabul qilish uchun chaqirish to'g'risida qaror qabul qilgan taqdirda mazkur qaror haqidagi axborot Boshqaruvga Kuzatuv kengash majlisi o'tkaziladigan kuni topshiriladi.

30. Kuzatuv kengash majlisi texnika vositalari (videokonferens-aloqa) orqali ham o'tkazilishi va tegishli qarorlar qabul qilinishi mumkin.

6-bob. Kuzatuv kengash a'zolarining huquq va majburiyatlari

31. Kuzatuv kengash a'zosi quyidagi huquqlarga ega:

o'z mulohazalarining mustaqilligi bo'yicha talablarga rioya etishi;

Kuzatuv kengash yig'ilishida shaxsan ishtirok etish, yig'ilishda muhokama etilayotgan masala bo'yicha reglamentda ajratilgan vaqt doirasida so'zga chiqish;

sirtidan ovoz berish yo'li bilan qabul qilinayotgan qaror bo'yicha o'z fikrini berish;

muayyan davr mobaynida bank faoliyatining natijalari, uni rivojlantirish rejaları haqida to'liq va ishonarli axborot olish;


zimmasidagi vazifalarni bajara turib Kuzatuv kengashdagi ishi uchun muayyan mukofot olish.

32. Kuzatuv kengash a'zolari o'rtasida vazifalar Kuzatuv kengash raisi tomonidan taqsimlanadi.

Kuzatuv kengash a'zolariga o'z vazifalarini bajarib turgan davr uchun Bankning ichki qoidalariga muvofiq haq to'lab boriladi.

33. Kuzatuv kengash a'zosi quyidagi majburiyatlarga ega:

benuqson ishchanlik obro'siga, bank tavakkalchiliklarining samarali



boshqarilishini, o'z vakolatlari doirasida asosli qarorlar qabul qilinishini ta'minlash uchun zarur bo'lgan tajribaga, bilim va ko'nikmalarga ega bo'lish;

Bank manfaatlari hisobga olingan holda o'z vakolatlarini amalga oshirish;

Bank Ustavida belgilangan tartibda malakali Boshqaruv a'zolarini ishga yollash va ularni tasdiqlash;

Boshqaruv bilan maslahatlashgan holda Bankning biznes-rejasini belgilash va ijrosini nazorat qilish;

Bank maqsadlariga erishish hamda qonuniy, xavfsiz va samarali bank faoliyatini yuritish uchun zarur ichki qoidalarni belgilash;

qonunchilik hujjatlariga va Bank siyosatlariga muvofiq bank operatsiyalari ustidan amalga oshirilayotgan yetarli nazoratni amalga oshirish;

Bankning joriy faoliyatini kuzatish;

amaldagi qonunchilik hujjatlari, Bank Ustavi va mazkur Nizom bilan belgilangan vakolatlar doirasida boshqa majburiyatlar.

34. Kuzatuv kengash a'zosi Bank taraflardan biri bo'lgan bitimda moliyaviy manfaatdorlikka ega bo'lgan holatda, shuningdek Kuzatuv kengash a'zosining boshqa manfaatlar to'qnashuvi holatida Kuzatuv kengash a'zosi bitim tuziladigan paytgacha Kuzatuv kengashni o'z manfaatdorligi to'g'risida oldindan xabardor qilishi shart, bitim to'g'risida qaror esa Kuzatuv kengashning bunday manfaatdorlikka ega bo'lmagan a'zolarining ko'pchilik ovozi bilan qabul qilinishi yoxud Aksiyadorlarning umumiy yig'ilishi tomonidan qabul qilinishi kerak. Bunda, Kuzatuv kengashning manfaatdor a'zolari bunday bitim bo'yicha muhokamada ham, qaror qabul qilishda ham ishtirok etmaydilar.


35. Bank o'ziga aloqador shaxslar bilan qonunchilik hujjatlarini hisobga olgan holda faqat Kuzatuv kengashning qaroriga ko'ra bitimlar tuzishi mumkin. Agar shaxs Bank bilan bitim tuzish bo'yicha shartnoma imzolanganidan keyin Bankka aloqador shaxsga aylansa, Kuzatuv kengash shaxs Bankka aloqador shaxsga aylangan kundan e'tiboran o'ttiz kun ichida mazkur shartnomani ma'qullashi yoki uni bekor qilish to'g'risida farmoyish berishi kerak.

36. Kuzatuv kengash a'zosi Bank bilan o'zi o'rtasida yoki o'ziga aloqador shaxs o'rtasida tuzilgan yoki tuziladigan bitim masalasi ko'rilayotgan Kuzatuv kengash yig'ilishida hozir bo'lmasligi, Kuzatuv kengash qabul qiladigan qarorga ta'sir ko'rsatishga urinmasligi kerak.

37. Kuzatuv kengash a'zolari Kuzatuv kengash tomonidan biron-bir qarorlar qabul qilinishiga ta'sir o'tkazganligi uchun bevosita yoki bilvosita mukofot olish huquqiga ega emaslar.

38. Kuzatuv kengash a'zolari Bank imkoniyatlaridan (mulkiy yoki nomulkiy huquqlar, xo'jalik faoliyati sohasidagi imkoniyatlar, bank faoliyati va rejalari to'g'risidagi axborotdan) shaxsiy boylik orttirish maqsadida foydalanishga haqli emaslar.

39. Aksiyadorlarning umumiy yig'ilishi manfaatlarini va huquqlarini Kuzatuv



kengash quyidagi usullar bilan himoya qiladi:

Aksiyadorlarning umumiy yig'ilishining manfaatlarini hisobga olgan holda Bank faoliyatini samarali tashkil qilish;

Bankning ustav kapitalini ko'paytirish yoki kamaytirish, qo'shimcha aksiyalar va shu kabilarni chiqarish yo'li bilan o'zgartirilganida aksiyadorlarning huquqlari kamsitilishiga yo'l qo'ymaslik;

Bankning samarali dividend siyosatini ishlab chiqish;

Aksiyadorlarning umumiy yig'ilishi bilan o'zaro munosabatlarga bog'liq masalalarni ko'rib chiqish;

Boshqaruvning g'ayriqonuniy hamda noloyiq harakatlari ustidan aksiyadorlarning shikoyat va takliflarini o'rganish.

7-bob. Bank faoliyati ustidan nazoratni amalga oshirish

40. Kuzatuv kengash Boshqaruvdan Bankning moliyaviy ahvoli va faoliyati to'g'risida sharhlar hamda yozma hisobotlarni, jumladan ularni yaxshilashga oid tavsiyalarni olib turadi, shuningdek Boshqaruv raisi va Ichki audit boshqarmasining ma'ruzalarini tinglaydi.

Kuzatuv kengash a'zolari shunday hisobotlar va tavsiyalarning to'g'riligini hamda amalga oshirish mumkinligini aniqlash maqsadida ularni sinchiklab tekshiradilar.

41. Kuzatuv kengash Bank faoliyati ustidan nazoratni amalga oshirish bo'yicha vazifalarni bajarish uchun tegishli qo'mita (va/yoki komissiya)lar tashkil etishi va ular to'g'risida nizomlarni ishlab chiqishi mumkin.

42. Har bir qo'mita (va/yoki komissiya) o'z faoliyat masalalari bo'yicha mustaqil yig'ilishlar o'tkazadi va Kuzatuv kengash oldida amalga oshirilgan ishlar yakunlari to'g'risida hisobot berib boradi.


43. Qo'mita (va/yoki komissiya)lar tarkibiga Kuzatuv kengashning a'zosi (a'zolari) kiritilishi lozim.

44. Kuzatuv kengash qo'mita (va/yoki komissiya)larga yuklatilgan vazifalar va majburiyatlar ijrosini muntazam ravishda nazorat qilishi, bunga yetarlicha vaqt ajratishi va qo'mita (va/yoki komissiya)larning tajribali a'zolar bilan butlanishini ta'minlashi shart.

8-bob. Kuzatuv kengash a'zolarining javobgarligi

45. Kuzatuv kengash a'zolari o'z huquqlarini amalga oshirishda o'z burchlarini bajarishda Bank manfaatlarini ko'zlab ish tutishlari lozim. Kuzatuv kengashning a'zolari qonunchilik hujjatlari va Bank Ustaviga muvofiq Bank va Aksiyadorlarning umumiy yig'ilishi oldida javobgardir.

46. Kuzatuv kengash majlisida ovoz berishda qatnashmagan yoki Bankka ziyon yetishiga olib kelgan qarorga qarshi ovoz bergan Kuzatuv kengash a'zolari javobgarlikdan ozod qilinadi.





9-bob. Yakuniy qoidalar

47. Mazkur Nizomga kiritiladigan o'zgartirish va qo'shimchalar Aksiyadorlarning umumiy yig'ilishi tomonidan tasdiqlanadi.

48. Ushbu Nizom talablariga rioya qilinmagan mas'ullar qonunchilik hujjatlarida belgilangan tartibda javobgarlikka tortiladi.

49. Mazkur Nizom bilan tartibga solinmagan masalalar O'zbekiston Respublikasining amaldagi qonunchilik hujjatlarida belgilangan tartibda hal etiladi.

50. Ushbu Nizomning alohida bandlari amaldagi qonunchilik hujjatlariga zid bo'lsa, ushbu bandlar o'z kuchini yo'qotadi va ushbu bandlarga o'zgartirish va qo'shimchalar kiritilgunga qadar O'zbekiston Respublikasining amaldagi qonunchilik hujjatlari normalariga amal qilinadi.


07.10.2025

YURIDIK XULOSA
(ichki qoidani huquqiy ekspertizadan o'tkazish to'g'risida)

Toshkent shahar

“07” 10 2025 yil

Ekspertiza o'tkazuvchi: “Open bank” aksiyadorlik jamiyatning (keyingi o'rinlarda “Bank” deb yuritiladi) Yuridik boshqarmasi.

Ekspertizadan o'tkazilgan me'yoriy hujjat nomi: “Open bank” aksiyadorlik jamiyati Kuzatuv kengashi to'g'risidagi nizom (keyingi o'rinlarda “ichki qoida” deb yuritiladi).

Ekspertiza o'tkazishda foydalanilgan qonunchilik va me'yoriy hujjatlar: O'zbekiston Respublikasining “Aksiyadorlik jamiyatlari va aksiyadorlarning huquqlarini himoya qilish to'g'risida”gi, “Banklar va bank faoliyati to'g'risida”gi qonunlari, Markaziy bank tomonidan tijorat banklarining ichki qoidalariga qo'yiladigan talablar to'g'risida nizomi va boshqa amaldagi qonunchilik hujjatlari, hamda “Open bank” aksiyadorlik jamiyatning ustavi va boshqa ichki me'yoriy hujjatlar (keyingi o'rinlarda “qonunchilik va me'yoriy hujjatlar”).

Mazkur ichki qoida qonunchilik va me'yoriy hujjatlarga muvofiq ishlab chiqilgan bo'lib, Bankning Kuzatuv kengashi maqomini va faoliyat yuritishini belgilaydi, Bankning Kuzatuv kengashi tomonidan amaldagi qonunchilik hujjatlariga va Bank Ustaviga muvofiq o'z vakolatiga kiritilgan qarorlar qabul qilinishini tartibga soladi.

Ushbu ichki qoida ishlab chiqishda qonunchilik texnikasi qoidalariga rioya qilingan.

Mazkur ichki qoida, agar unda boshqa muddat ko'rsatilgan bo'lmasa, Bankning aksiyadorlarning umumiy yig'ilishi tomonidan tasdiqlangan kunning ertasidan kuchga kiradi.

Ushbu ichki qoidaga o'zgartirish va qo'shimchalar Bankning aksiyadorlarning umumiy yig'ilishning qarori asosida kiritiladi.

Markaziy bankning normativ-huquqiy hujjatlarida ishlab chiqilishi belgilangan ichki qoidalar, shuningdek ularga kiritiladigan o'zgartirish va qo'shimchalar tijorat banklari tomonidan tasdiqlangandan so'ng 15 (o'n besh) kun ichida Markaziy bankka taqdim etilishi kerak.

“Open bank” aksiyadorlik jamiyatning
Yuridik boshqarmasi boshlig'i
S.I. Salimov